

Dal temp da Culan da Crestaulta

Las epocas preistoricas en il Grischun en survista

Las epocas da la preistorgia vegnan fixadas systematicamain pir dapi il cumenzament dal 19avel tschientaner. Il preistoricher danais C.J. Thomson (1788–1865) ha fundà il sistem da las trais periodas. Tenor quel vegn l'istorgia culturala da l'umanitad dividida en in temp da crap, da bronz e da fier. Tranter il 1880 ed il 1912 han ins stgaffi ils sistems anc oz valaivels per estructurar la preistorgia europeica.

Il temp da crap è l'epoca la pli veglia e la pli lunga en l'istorgia da l'umanitad. Ils pli vegls utensils construids da l'uman dateschan d'avant 2–3 milliuns onns ed en vegnids chattads en l'Africa da l'ost. Pir ils utensils a piz, chattads en l'Africa, l'Europa dal vest, la Penisla Iberica, l'Asia Minura e l'India, permettan d'attribuir ils utensils geograficamain e tipologicamain dal punct da vista



da lur svilup.

Avant circa 50 000–40 000 onns eran apparentamain abitate zonas climaticas pli chaudas sco era zonas main ospitaivlas en l'Africa ed en l'Eurasia. L'uman è alura sa derasà en l'Australia ed avant ca. 25 000 onns en l'America. Cun l'invenziun da furmas economicas productivas – il pureser primitiv – avant ca. 10 000 onns è la populaziun creschida fermamain. Quai è stà ina premissa per in'ulteriura divisiun culturala.

Il temp da crap en il Grischun

Ils emprims fastizs umans (chatschaders) scuverts en il Grischun dateschan d'enturn 10 000 a.C. (temp paleolitic tardiv) ed en vegnids mess a la glisch il 1998–99 sin il territori dal Marsöl/Cuira. Grondas parts da las Alps grischunas eran da quel temp cuvertas da glatschers.

Dal temp mesolitic (8500–5500 a.C.) exista fin oz pir in sulet lieu da chat (Tec Nev/Mesocco). Objects mess a la glisch en la Val Son Giachen limitrofa laschan dentant sperar ch'ins possia scuvrir en l'avegnir auters lieus da repaus da chatschaders dal temp mesolitic era en il Grischun.

Dal temp neolitic (5500–2200 a.C.), l'epoca en la quala l'uman ha cumenzà a sa domiciliar ed a producir virtualias, dateschan restanzas da plirs areals abitads: dal Tec Nev, da l'areal Zindel ed Ackermann/Cuira (Rosenhügel e Welschdörfli), dal Petruschügel (rumantsch er: Bot la Cresta)/Cazas, da l'areal Crestis/Tumein e dal Pian del Remit/Castaneda. La plipart dals abitads neolitics eran concentrads en las valladas pli bassas ed orientads culturalmain vers il nord ed il sid. Spezialmain interessants en ils fastizs neolitics d'araders, scuverts a Cuira ed a Castaneda. Era en valladas pli autas existan dentant indizis d'ina preschientscha umana durant il temp neolitic, p.ex. en l'Engiadina (cuvels a Zernez, Ova Spin/Pass dal Fuorn, Charnadüra/S. Murezzan) ed en la Val d'Avras (cuntgadel-la da crap perforada ad Avras-Juppa); i sa tracta qua da lieus da repaus u d'objects pers da pasters e chatschaders. Da quel temp (ca. 3300 a.C.) datescha dal remiment er il famus chat da la mumia Ötzi en il Tirol dal Sid, er quai in mussament per la preschientscha da l'uman en las Alps gia en il temp neolitic.

Cultura da bronz interalpina

Ina colonisaziun intensiva dal Grischun è succedida pir en il temp da bronz (ca. 2200–800 a.C.). Ins ha chattà fin oz passa 50 abitads da quel temp, p.p. era en valladas pli autas. Questa colonisaziun stat apparentamain en connex cun la tschertga da giaschaments d'arom. Dal temp da bronz existan interessantas structures d'urbarisaziun: a Padnal/Suagnign, a Cresta/Cazas, a Crestaulta/Surin (vischnanca da Lumbrein), a Mottata/Ramosch, a Sennhof-Karlhof/Cuira ed en auters lieus han ins



Petroglifas a Carschenna/Seglias

FOTO ANDREA BADRUIT

pudi cumprovar palissadas, construcziuns da travs e da pitgas verticalas, ma era entiras parts d'abitadis. A Padnal/Suagnign han ins perfin chattà ina colonia da chasas en ina lingia ed ina tala en trais lingias cun in'indriz da cisterna. Chats da fossas dal temp da bronz dattan perditga da sepulturas cun objects agiuntads per il temp da bronz tempriv (Surses/Donat) e da cremaziuns cun fitg bliers objects agiuntads per il temp da bronz mesaun (Cresta Petschna/Surin, Padnal/Suagnign). En il temp da bronz tardiv paran d'avair existì cremaziuns e fossas d'urnas.

Dal temp da bronz mesaun (ca. 14./13. tschientaner a.C.) datescha l'enchaschament da la funtauna a San Murezzan Bagn, scuverta il 1907. La funtauna exista per part anc oz en sia furma originala. L'enchaschament da l'aua ha purtà a la glisch plirs objects da bronz, tranter auter era spadas ch'eran senza dubi plitost unfrendas ad ina divinitad da la funtauna che chats d'objects pers. Dal temp da bronz derivan era differents chats da munaidas, p.ex. in deposito a Montagna/Aschera cun objects da bronz sumegliants a barras e modens (furmas da cular) ed in chat da munaidas a Filisur. Daspera han ins chattà numerus objects singuls sco maneras da bronz, pizs da lantschas, gluvas da vestgadir, stilets, spadas, cuntels, bratschlets ed auter pli.

Dal temp da bronz, evtl. era dal temp da fier, pudessan datar finalmain las petroglifas a Carschenna/Seglias ed a Senslas/Tinizong. I sa tracta oravant tut da cuppins e da tschertgels concentrics, ma era da subjects antropomorf e zoomorf e d'alters dissegns. Ins na po betg dir cun garanzia, sche questas petroglifas stattan en connex cun acts cultics. Dal temp da bronz pudessan datar era intgins dals numerus craps-scalutta e dals craps cun dissegns dal Grischun (p.ex. a Tumihügel/Maladers, Pleun da Buora/Ruschein, Muota/Falera e.a.), entant che auters paran da derivar d'in temp pli vegl u pli tempriv, p.p. forsia schizunt d'ina epoca postromana.

Ils chats dal temp da bronz tempriv e mesaun, scuverts en il Grischun, paran d'appartegnair ad in circul cultural relativamain serrà ch'ins enconuscha sco Cultura da Crestaulta u (meglier) dal temp da bronz interalpin e che sa distingua relativamain bain da las culturas al nord ed al sid da las Alps. Quest circul cultural cumpliava grondas parts dal Grischun, parts da la Val dal Rain alpina e dal Vnuost ed ulteriuras parts dal Tirol dal Sid. La populaziun dal temp da bronz interalpin viveva da l'agricultura e da l'allevament da muvel. La chatscha giugava mo pli ina rolla subordinada. En pliras vals vegnivan dentant era explotads minerals d'arom ch'ins

tractava ed elavurava ad artefacts da bronz. Ultra da quai pon ins cumprovar per il temp da bronz in commerzi intensiv sur ils pass alpins.

Trais circuls culturals sa furman

En il temp da bronz tardiv (ca. 1300–800 a.C.) paran autras culturas d'avair remplazzà per gronda part la Cultura da bronz interalpina (numnada pli baud Cultura da Crestaulta): numerus culegnas en spardas durant quest temp, autras en vegnidas substituadas. En il decurs dal temp da bronz tardiv è entrada la Cultura da Laugen-Melaun dal sidost (Tirol dal Sid) en l'Engiadina Bassa. Dal nord (Svizra Bassa/Germania dal Sid) è avanzada la Cultura da santeris cun urnas, cuvrada p.p. da la Cultura da Laugen-Melaun, vers il Grischun Central ed il Grischun dal Nord. Dal sidvest (Tessin/Lumbardia) è sa stabilida ina cultura tessinais-lumbarda dal temp da bronz tardiv en la regiun dal Mesauc. Uschia han cumenzà a sa furmar en il temp da bronz tardiv trais circuls culturals pli gronds en il territori grischun.

Durant il temp da fier (ca. 800–15 a.C.) pon ins constatar in svilup pli u main cuntinuand dals trais circuls culturals en il Grischun. En il Grischun dal Nord ed en il Grischun Central ha cumenzà a sa furmar dapi il temp da fier pli vegl il circul da las gruppas da las vals dal Rain alpinas. Ils emprims fastizs da quest circul fermamain influenzà da la Cultura (celtica) da Hallstatt en vaschs cun dissegns cotschens e nairs (champ da fossas da Tumein, cuppeta da Favugn e.a.). En il temp da fier pli tardiv (circa 6. tschientaner a.C.) dominava en questa regiun ina fina cheramica grisch-naira cun musters bullads e rudlads e cun decors linears. Ins chatta questa cheramica, ch'ins soleva era numnar «cheramica da Tumein», en la Val dal Rain alpina da la Surselva fin quasi al Lai da Constanza. En las culegnas dal Welschdörfli e Sennhof-Karlhof/Cuira han ins era pudì observar interessantas structures architectonicas.

Al sidost dal Grischun, en la regiun da l'Engiadina Bassa e da la Val Müstair, cuntinuescha en il temp da fier tempriv la Cultura da Laugen-Melaun. Quest circul cultural, che dispona d'ina tipica cria cun mansch, derivava dal Trentino (Tirol dal Sid), cun il qual l'Engiadina Bassa furmava

in circul cultural serrà. Lieus d'abitadi impurtants da la Cultura da Laugen-Melaun en l'Engiadina Bassa en Suotchastè/Ardez, Munt Baselgia/ Scuol e Mottata/Ramosch.

La situaziun avant l'arrivada dals Romans

En il champ da fossas da Tumein, situà al pe da la vischnanca, han ins chattà sulettain urnas da cremaziuns. Quest circul cultural dal temp da Latène tempriv e mesaun (ca. 5.–3. tschientaner a.C.) dispona d'ina cheramica pli massiva cun furmas cumprimidas ed ornamentals pli grops, l'uschenumnada cheramica da Schneller (gruppa da la val dal Rain alpina dal temp da fier pli tempriv). Questa cheramica è sa sviluppada senza dubi da quella da Tumein. En il temp da Latène tardiv (2./1. tschientaner a.C.) cumparan puspè plirs elements celtics en il Grischun dal Nord. Staziuns impurtantas en Bot da Loz/Lantsch, Spundas/Scharons e Bot Panadisch/Panaduz. En Surselva han ins chattà en las fossas da Trun-Darvella e da Luven sepulturas dal temp da Latène, influenzadas fermamain da la cultura celtica e leponica.

Durant il temp da fier tardiv sa lascha distinguer al sidost dal Grischun (Engiadina Bassa e Val Müstair) l'uschenumnada Cultura da Fritzens-Sanzeno ch'è probablamain sa sviluppada da la Cultura da Laugen-Melaun. Las furmas tipicas da quella cultura en las uschenumnadas cuppas da Sanzeno e quellas da Fritzens. Chats da la Cultura da Fritzens-Sanzeno existan per la plipart dals abitadis da la Cultura da Laugen-Melaun. Ins ha dentant anc strusch chattà fin qua objects da fossas da quest circul cultural. Bliers supponan che questa cultura haja enconuschà lieus d'unfrendas da fieus, v.d. lieus cultics nua ch'ins sacrificava animals, ma era umans u pumaraida a differents dieus (p.ex. a Russonch/Scuol).

Al sidvest dal Grischun, en la regiun da las vals Mesauc e Calanca, chatt'ins ina terza cultura pli gronda ch'ins numna Cultura da Golasecca. Abitadis da quest circul cultural tessinais-lumbard en strusch enconuschents. La Cultura da Golasecca è però attestada tant meglier tras chats da fossas. En il Mesauc han ins scuvert pliras urnas, ma era fossas cun interessants objects agiuntads (p.ex. situlas da bronz, cistas chavettadas, plattas da tschintas, fivlas, ureglins, cheramica, e.a.). A Castaneda han ins mess a la glisch fin qua passa 100 fossas cun numerus objects agiuntads (tranter auter era chantas cun tatotsch e per part cun inscripziuns). Era a Cama ed a Sta. Maria e.C. han ins chattà divers objects agiuntads a fossas. Tenor la ritgezza da tut quests objects da fossas para la populaziun da las vals dal sid dad esser stada ina sort d'intermediatura tranter il sid ed il nord.

Per quai che riguarda la situaziun etnica vegn postulà gia daditg ch'ils represchientants da la Cultura da Laugen-Melaun e surtut quels da la Cultura da Fritzens-Sanzeno sajan identics cun ils Rets, ch'il center da questa cultura retica sa chattia dentant en il Trentino (Tirol dal Sid) ed en l'Engiadina Bassa. Il circul da la Cultura da Golasecca al sidvest dal Grischun vala per regla sco circul leponic u celtic-liguric. Il circul da las gruppas da las vals dal Rain alpinas, derasadas al nord ed en il center dal Grischun, vegn numnà circul cultural celtic u celtic-retic. Las truppas romanas vegnan ad avair inscuntra en scadin cas ina gronda diversità culturala e linguistica durant lur campagna militar, interpretada en las Alps grischunas l'onn 15 a.C.

EPOCAS PREISTORICAS EN IL GRISCHUN

Temp da fier pli nov (temp da Latène) (450–15 a.Cr.)	Stadis da stirpas cun la noblezza a la testa; Celts (Helvets euv.), Rets, Leponts	Migraziuns; emprimas culegnas da caracter urban; contacts commercials intensivads; entschatta da l'economia monetara	Valladas dal Rain: Grappa alpina renana (Celts) Engiadina, Val Müstair: Fritzens-Sanzeno (Rets) Mesauc, Bregaglia: Golasecca (Leponts)
Temp da fier pli vegl (temp da Hallstatt) (800–450)	«Prinzis» a la testa d'unitads politicas; Protocelts	Explotaziun da fier; contact cun la regiun da la Mar Mediterrana; «commerzi» en furma da barat da regals «diplomats»	Valladas dal Rain: Cultura da santeris cun urnas e Laugen-Melaun / Hallstatt
Temp da bronz tardiv (cultura da santeris cun urnas) (1200–800)	Las ierarchias socialas vegnan rinforzadas; intginas culegnas fortifitgadas	Elavuraziun da bronz; entschatta da la spezialisaziun artisanala; barat da martganzia intensiva; a la vieuta dal temp neolitic al temp da bronz: «cultura da megalits»	Engiadina, Val Müstair: Cultura da Laugen-Melaun Mesauc: Cultura tessinais-lumbarda
Temp da bronz tempriv e mesaun (2200–1200)			Trun, Lumbrein, Falera, Cazas, Seglias/Carschenna, Savognin, San Murezzan, Ramosch (Cultura da bronz interalpina)
Temp neolitic (5500–2200)	Societads productivas cun cultivaziun dad ers ed allevament da muvel	Vita sedentara; chasas stablas; cheramica; invenziun da la roda; barat da martganzia; emprima elavuraziun d'arom.	Zebras, Cuira, Tumein, Untervaz Castaneda
Temp mesolitic (8500–5500)	Culturas da chatschaders dal temp postglazial cun territoris pli pitschens	Armas ed utensils cun nizzas da silix fitg pitschnas («microlits»)	Mesocco
Temp paleolitic (enfin 8500)	Ils emprims umans en Svizra: l'uman da Neandertal e l'uman modern; culturas da chatschaders dal temp glazial	Utensils da crap, lain, corna ed oss; artisanat; religiu; sepulturas	Cuira

Grafica: LA QUOTIDIANA

La preschientaziun:

Dossier «Preistorgia»

Dapli infurmaziuns:

chatta.ch/?hiid=1588

www.chattà.ch